

QVÆSTIO MEDICA

Quodlibetariis disputationibus manè discutienda in
Scholis Medicorum die Jovis 23. Decembris.

M. RAYMUNDO FINOT, Doctore Medico, &
Pharmaciz Professore, Præside.

An ex Urinis certa valetudinis auguria?

I.

AUGURIA Valetudinis non unâ ratione constant, inscripta manibus lineamenta velut indices futurorum notas quorundam curiositas suspicit, è quibus & proprietates hominum nosci, & quod adversæ valetudinis genus in quoque timeri debeat prospici possit, subtilitate jucundâ magis quàm solidâ : è cælo non pauci verissimè futura peti credunt, persuadentque sibi, morbo detentis sydera, ex se invicem variè temperata, salutem modo, modo perniciem creare; Hi promissionum blandimentis spem alunt; spes etiam incertâ ratione fovetur, ut licet vaga duntaxat & arbitraria effutiant, fidem tamen habeant; adeo blanda est sperandi pro se cuique dulcedo. Et ipsa urinarum contemplatio artem effecit: in his velut in speculo quid aut intus in morbis sit, aut venturum sit, intueri se multi profitentur, majore nullibi mendacij luxuriâ. At verò Medici melioribus alimentis educati rei modum adhibent, urinam intuentur, nec tamen prius urinæ credunt, quàm collatis undique signorum viribus, & significationibus appensis certam morbi conjecturam acceperint. Equidem inter functiones pulsus eminet, eminet lotium inter excrementa: duobus enim vita continetur: calore cordis, viscerum coctione: Pulsus ictu reciproco calorem ex usu naturæ temperat: coctionis modum oculis urina subjicit. Res tamen fallacissimæ & pulsus & urina; illum facile mille res turbant; hæc naturæ suæ modum vix retinet, ferè alienâ permutatione conspersa; ut qui ex urinæ ingenio morbos æstimaturus accedit, præsidium calliditatis amplexus, artem arte deludat, casurus tandem, ni frequentis, alieno stupore, quàm suâ providentiâ tutus.

II.

URINA serum est humorum in venis contentorum, serum non mite & aqueum, sed multiplici rerum perfusione temperatum, ut si artis ope ad sua revocetur elementa, plurimum salis & aquæ, bilis aliquantulum, tantillum terræ, & spiritus obtinuisse videatur. Ortum habet à liquore quocumque solidior cibus diluitur; Quemadmodum enim aqua lixivio cineri affusa, si percoletur, variis salium saporibus, succorumque viribus imbuta prodit, non sine coloris elegantia: Ita liquor ille cuncta permeans, dum cibo sanguinique permiscetur, solutas coctionis æstu salis, succique biliosi particulas ebi-

bens, tum coloris, tum substantiæ suæ modum adipiscitur, ut verè lixivium dici possit, quæ sanguinem ipsa eluens, salium copiâ levet. In hac lixivii tincturâ, mirum, quantum possint ventriculus, & intestina, ut si tardius inibi procedat coctio, lotium exeat coloris gratiâ destitutum: Sin concitatis plus æquo digestionis auxiliis nimia fiat solutio, rubeant urinæ ad saturitatem usque. His initiis serum plurimo sale jam prægnans subit majora vasa, sanguinique pro vehiculo permixtum, hunc ita diluit, ut assiduo incremento salis adhuc multum, bilisque flavæ tenuioris aliquid sibi asciscat, plus minus ut ferveret sanguis & accenditur in cordis specu, bilis mixtura colorem cumulat, jugique tandem circuitu ita salem acuit, ut hujusce nativæ indole abdicatâ è fixo in volatilem erigat penè totum. Sic fervori sanguinis respondet urinæ color, illiusque modus hujus æstimatione ferè terminatur. Qui ritè lotij colorem suis causis acceptum referre noverit, jam temperandæ coctionis modum, atque adeo ipsius sanguinis & humorum indolem intellexit. Serum his aculeis instructum dum eâ quâ pollet partium tenuitate sanguinem per angusta viarum quoquoersum deducit, succi nutritij crudioris portiunculam rapit, sorbetque in hypostasis spirituum ope colligendam. Hypostasis febrium initiis nulla percipitur; vulneri febris aliena superveniens pus ortum cohibet: impedita causis morbificis natura cibum non conficit, ut reverà sit absolutæ coctionis index hypostasis, arguatque naturam represso morbi tumultu ad consueta redire munia.

III.

UT reliquum corpus, sic renes lustratione continuâ sanguis perluit. Renum substantia glandulis constat, ceu totidem exiguis renibus inter se quam aptissimè coherentibus: hæ cæcis meatibus perviæ arteriarum ôscula admittunt, emittunt verò tubulos fibrarum instar propria excretionis urinæ vasa. In his renum angustis sit sanguinis veluti *Stéppons* quædam, jugisque feri secretio: an percolatione solâ? an etiam virtute fermenti, cujus halitui laxior sanguis inspiratus contrahitur, serumque spongiosâ sui densitate admissum præceps excludit? Certè quæ medicamenta lac cogunt, eadem urinam movent. Atque ut excrementi cujusque maximè proprium est partis unde manat constitutionem referre, sic urina partium à quibus oritur conditionem renunciat, ut licet de toto maximè decedat, omnis tamen illius significatio, aut ad viscera coctioni dicata, aut ad majora vasa pertineat; in his absolvitur, inchoatur in illis. Qui viscerum habitum sanguinisque temperiem explorare voluerit, urinam consulat, non ineptum: utque tum primæ, tum secundæ coctionis est excrementum, ita coctionis, aut cruditatis fida quandoque nuncia, simul per coctionem, & cruditatem, salutem aut interitum, judicii celeritatem, aut tarditatem innuit: an & ipsam invaletudinem? Verè dicam, non tam morbum exhibet, ipsiusque symptomata, quàm morbi causam; nec tam morbi speciem, quàm genus in quo morbus continetur, an caloris siccitativæ plus minus particeps sit, ut tunc præcipui sit in arte momenti urinarum contemplatio, cum & morbi ætates assequi, & aptissima medendi tempora captare animus est. Est tamen quod in his Medicus imperitus falli possit: ferè enim veritatis fidem urina non servat, sed vel specie rectè ludit incautos, vel specie pravi terret imperitos: In tenuissimo victu aut temperie biliosissimâ nihil est reliquiarum, ut nulla in coctionis argumentum colligi possit hypostasis: In quibusdam proprietate naturæ, quin & crisi quadam, pessimæ ad speciem urinæ

diu profunduntur, in his omnibus securus æger evadit, interim urina mendax periculum intendit. Contrà in febris malignis meretricia est, ac quodam nitoris fugo blanditur, ut in summo penè discrimine, etiam sanitatis decus mentiatur. An quod cæco, obscuroque veneno perfusus sanguis sensim ac tacitè corrumpitur? An veneni vis aliò propulsa, jamque syderati sanguinis stigmata in cute elucet purpureis maculis hinc & hinc depicta? Nec raro in febre putrida nullius malignitatis particeps post urinas diu concoctas, interitum nullo errore consequi prodidit experientia; ut qui urinis fidens, etiam ritè concoctis, naturam bellè operantem admiraturus cessaverit, fidem plerumque doceat, lapsusque occasionis momentum. Certioris tamen urina fidei est renuendo, quam annuendo, nec tantæ securitatis cocta, quanti periculi cruda.

IV.

QUID singula memorem penè infinita, quibus omnis disciplinæ ratio confunditur, ut nullus observationis tenor constare possit. Largior potus copiosorem urinam profert, eamque tenuem & crudam, non pauca vel usu medicæ illam alieno vel colore inficiunt, vel odore perfundunt, ut his præsentibus de interiori constitutione certi nihil statui possit. Taceo renum & Vesicæ vitia, quorum sordibus varias illa mutationes plerumque subit. Sed & ipsum quod quisque sequitur vitæ genus urinas diluit vel obscurat. A pastu quoque quæ primò funditur, pallidula fluit: ardet post longa jejunia? Quid si succusâ purgantibus humorum mole contingat Fluere vitiosorem? Sed nec morbo cuiquam ita propria & sua est urinæ ratio, ut ex hac certum illius duci possit indicium. Urina cui cremor innatæ tabem denunciat: at hoc ipsum hypochondriacis familiare. Crassior pituita mucinarium instar matulæ fundo adhærescens calculum arguit: at similem creat mucus sordidum cervicis vesicæ ulcus: tenuis & aquea urina cruditatis soboles est, quidni & obstructionis? Num eadem causa varios potest proferre morbos, variaque ciere symptomata? Solum ut inter ista certum sit, nihil esse certi. Eant nunc qui urinæ, etiam è longinquo comportatæ significationem ad omne valetudinis genus diffundunt. Quis non rideat hominis confidentiam dicam? an insciam, ex urinâ solâ, fortè non integrâ, sæpius corruptâ, eam sibi artem arrogantis quâ dignoscat hunc quidem è morbo convalescentem, sed oculis captum fore, illum dolere capite, pedibus alium, hanc denique morbi expertem, sed in utero habere, etiam à paucis diebus, ne dicam horis? Tantamne rem tam negligenter agi? At, inquires, si partes omnes sanguis perluit, quidni à singulis accipiat aliquid quod in unum urinæ corpus confusum interpreti multa oculorum consuetudine erudio nota sit partis affectû? Ita est, volvitur sanguis perenni motu: sed in hoc motu aut nihil accipit, aut quid commune quod pertinere possit ad omnes, nullius possit præferre indicium: ut, licet muliere uterum gerente, locum multis innatantibus impurum se se paulò turbidiùs evolvat, impuritas illa sit, non proprium graviditatis vitium, sed commune suppressionis mensium. Nec auguria solum in urinis quæruntur, sed & medendi artes, ut emissâ jam urinâ arcano rore pretiosè temperatâ hujusce virtus in urinam intus adhuc contentam evolet, ut Vesicæ remedio sit, minuendoque calculo. Nam licet utriusque urinæ liquores diffusi sint, tamen in iis ita natura continuatur, ut etiam convenient in unum quâdam naturæ communis proportionem, spiritûsque omniæ permeantis affinitate, in cuius opinionis commentum, licet nobile pariter &

rude vulgus cursu ierit, sympathiamale intellectæ titulo delusum, extrahit tamen commenti fides, ut illud vel profiteri summa sit hominum contemptio, vel credere summa animi socordia: neque enim absque Philosophiæ flagitio dici potest virtutem conservari posse per distantissima, ita ut quæ vis exit ab urinâ deferri possit incolumis ad vesicam. Verum lucri bonus odor è re qualibet, turpius tamen è mendacio lucrum, quàm è lotio.

V.

PROCUL igitur à nobis nostrisque literis absint ista scientiæ portenta, fallendique, non augurandi artes. An auguria sunt quæ temerè vel altitè d. & t., non tam necessariis ex causis, quàm peritis extrinsecus argumentis ducuntur? Sapien- tiæ consanguinea est ars augurandi, à judicio, non à fortunâ profecta. Vestigiis omnibus rem odoratur, intuetur propria, communia non spernit, ductâ quæ in omnes partes conjecturâ, cum præteritis præsentia, cum his futura componit, non opinionis caligine, sed scientiæ veritate. At, in- quies, & ipsi urinarum Interpretes multa incredibiliter vera sæpius effan- tur. Quidni? Imo vel urinâ nondum perspectâ eadem si voles vaticinabun- tur. Nam dum inter vera & falsâ quasi per tenebras ingredientiæ eunt, aut multa tentando incidunt imprudentes in veritatem, aut eorum qui ipsos consulunt multa credulitate ducente, callidè perveniunt ad ea quæ vera sunt, ut videantur hæc omnia ex urinâ perspicere. Nec exigua artis quam Conje- ctores isti proficiuntur Pars est procul ab urbe degere, naribus acutis minus apti, avibusque similes quarum intuitum nox illuminat, dies cæcat. Sed quo tandem impellente genio ad hujuscemodi augures velut ad salutis periculum nullum non hominum genus convolat, impellente Reginâ opinione? Ineptum enim vulgus, & aulicorum plures vulgus sunt. Sed quid facias, sic homines sunt: aut captantur aut captant. Nam dum semper aliquid immensum expe- ctant, obstupescunt ad id quod peregrini saporis suavitatem refert. Interim dum superflua quærant, necessaria non inveniunt. Qui si non opinionibus, sed veritatis studio ducerentur, urinæ significationem angustis finibus coercitam sentirent, ut urinam intueri quidem oporteat, sed huic non omnia credere.

Non ergo ex urinis certa valetudinis auguria.

Domini Doctores disputaturi.

M. Renatus le Comte.

M. Franciscus Afforty,

Scholarum Professor.

M. Nicolaus de Jouvençy.

M. Nicolaus Raveau.

M. Germanus Preaux.

M. Petrus Daquin,

Medicus Regis ordinarius.

M. Ioannes Garbe.

M. Paulus Courtois,

Regius Professor.

M. Guillelmus Petit.

Afferebat Parisiis JACOBUS DES PREZ, Parisinus.
A. R. S. H. 1677.

PARISIIS, Apud Franciscum Muguet, Regis & Illustrissimi
Archiepiscopi Parisiensis Typographum.